

摘藻堂四庫全書薈要

集部

欽定四庫全書薈要卷一萬五千八百四十一

集部

梅溪前集卷五

宋 王十朋 撰

詩

壬申中秋交朋解散不期而會者鄭生遜志夏
生伯虎因小飲翫月二子各以詩贈依韻酬之

鄭生襟宇絕纖埃夏子心希好學回誰遣吾人來破願
可能良夜不銜杯從來月罕中秋見那更尊無俗子陪
遙指桂枝因賀客文星近歲屬溫台

術士言文星近歲
正臨溫台鄭台人

夏溫
人

猶勝太白號三人又免韓公誚聚蚊薄有壺觴非獨酌
共將文字作清醺天高雲散懸金餅風峭溪涼皺穀文
却恨鍾情未能遣愁腸終夜轉車輪

書小成室

萬言如水北窻裏慷慨悲歌五夜長骨肉未知蘇季子
鄉間誰敬馬賓王為人心盡同毛穎與世交深類孔方
晦迹溪山可無恨蕭然一室任淒涼

哭孟丙

幼見孟丙年四歲從謝任之發蒙六歲從周誠叔能
誦蒙求孝經論及五言詩書院游從近百人類能道
其姓第名字或能優劣品藻之於所親之前予每說
書則與二兄侍立其側會茶與舉故事在羣兒中粗
爲了了者年才七歲而死紹興壬申實五月二十四
日也我輩鍾情痛不自己爲數詩以哭之

三歲甜酸學語兒能來壁下看題詩當時戲發十年問

添我無窮今日悲

子戊辰年題西軒壁令甲乙二子研墨捧硯孟丙兕戲于側始三歲予問

之曰汝十年後能詩乎應曰能二子顧予而笑因記之
壬申六月二十四日觀舊題時孟丙死已一月矣子舊
有和韓詩云學語二歲兕
笑味生甜酸蓋謂孟丙也

蕭瑟楊雄宅一區不堪老境失童烏
數莖鬚似經霜葉
為汝鍾情一夜枯

簾外飛飛燕哺雛
道傍兕戲聚游魚
老人含淚坐書几
不見吾兕已月餘

偃蹇衰翁四十餘
梅花溪上結茆廬
窓明几淨還如舊

不見是來覓紙書

偶作吾兒真夢寐暫來人世誤婁羅雖然修短由天命
致汝無辜我罪多

七年嬌姹尉衰翁回首追思一夢中與汝夙緣如未斷
重來當似顧非熊

家童拾栗因念亡兒作數語以寫鍾情之悲

去年覓栗嫌汝癡責汝曾賦淵明詩今年栗熟不汝見
淒然白骨埋荒陂西風簌簌黃葉飛家僮拾栗門前歸

汝兄汝妹爭來取汝父傷心淚如雨

林知常惠白酒六尊仍示酒法作十韻謝之

老去生涯付盃酒種秫辛勤三百畝東臯遺法嗟失傳
蜜汁蘆漿不通口邇來軟飽經月無豈有清歡對朋友
百錢強就村媪醉終夜蔬腸作雷吼先生祇把文字耕
妙意能施杜康手憐我新愁餘萬斛那更澆腸無五斗
分惠青州六從事秘法兼蒙傳肘後便同北海歌不空
免似東坡歎烏有嗟予偃蹇老更饜感激故人情意厚

會須續遣白衣來籬畔黃花欲重九

九日飲酒會趣堂者十九人老者與焉既醒念
不可以無詩因用贈林知常韻示諸友

我似揚雄貧嗜酒筆作耕犁紙為畝辛勤耕植三十年
往往糟醅罕濡口今年九日甕盎空誰饌先生荷諸友
衰顏迎醉生嫩紅饒腹隨飡失饑吼菊花不上老人頭
酒盞聊傳此時手文字飲韓嘉數子禮法拘髡惟一斗
衰翁興盡輒先歸不待盃盤狼籍後坐客高歌驚四隣

吾鄉已在無何有明朝黃花亦不惡俗眼無端自踈厚
酒醒聊記坐中人有似平原凡十九

陳元佐和詩贈以前韻

無功懶仕由堪酒故向東臯事田畝自慚耕稼非老農
歲入何曾給糊口通功易事媿無術謾闢書齋會鄉友
出技慙如鼯鼠窮說法強為師子吼交游漸覺不在眼
老拙自知當縮手陳生慷慨真可人文似良金膽如斗
論交何止十年前耐久遙期十年後把酒殷勤問黃菊

十年故舊寧多有士窮要使節義敦不見韓公稱子厚
北牕捉筆書惡詩醉中戲贈陳三九

周仲翔和詩贈以前韻

與子十年同把酒貧賤未能離隴畝今年依舊對黃花
會意何由笑開口老來鍾愛有三兒邇歲從師得吾友
祝螟方擬為羸飛舐犢俄驚作牛吼幼兒已作一覺夢
大匠徒施兩年手乙子沉疴賴營救再生豈止由南斗
嗟予屯厄世所棄急難誰肯相先後論交最喜子善終

報德深慚我無有猶憐甲乙二孺子莫景於渠意加厚
煩君為我嚴誨之母惜鞭笞九十九

陳獻可宋孝先萬孝傑夏伯虎和詩復用前韻

準擬重陽會詩酒手種菊花凡數畝佳節相逢俱可人
一一篇章堪適口揚庭醞藉更清新

陳

晉宋間人顏謝

友舜卿詞源浩萬斛宋下筆驚人風雨吼季梁蕭洒詩

如人飄然自是風騷手萬用之年少富文墨夏日出珠

璣不論斗誠叔思深希仲逸齊驅未識誰先後老朽那

能敵年少胸中空洞嗟無有張我三軍得數子造物遺
予非不厚明年秋戰豈無人雲夢定須吞八九

九日把酒十九人和詩者數人而已今已後期
不復追索許以來年九日還用前韻發一笑

勸君須飲文字酒勸君耕耨心中畝飲非文字猶聚蚊
心田不耕棘生口登高佳節豈易得况此相逢皆勝友
談傾坐上冰玉清興生筆下波濤吼我亦逢場聊戲劇
韻語殊非三昧手試投瓦礫已成堆辱報驪珠未盈斗

和之者寡豈陽春高才料恥居王後嗟我窮愁無以遣
酒債詩篇行處有與茲飲會類平原逃我詩盟幾高厚
如今並許隔年還宜須日月逢重九

宋孝先示讀自寬集復用前韻

老去悲秋強自寬少陵九日詩

也予老境失幼子逢秋益悲凡所以強自寬者一寓於詩也錄自中秋以前古律詩數十篇目

曰自

寬集

淵明酷愛尊中酒季子貧無負郭畝我生薄與二子同
俯仰人間亦緣口一室蕭然僅容膝毛穎陶泓自相友

會心終日雌聲讀排悶有時麤氣吼感秋詩集名自寬
雕琢更慙非妙手篇章不工如子固聲名敢望星之斗
宋生輒作過情語十韻殷勤為跋後譽之韓柳誰敢當
意古語竒吾豈有何如操矛時入室鍼我膏肓乃相厚
床頭周易深且神毋惜往來論六九

再用前韻述懷并簡諸友

太白佯狂喜盃酒元龍豪氣恥求畝揮毫爛吐風月篇
濟世高談霸王口古人可作誰與歸白也吾師登可友

萬言牕下盃水冷百尺樓頭鼻聲吼丈夫未遇聊爾耳
肯向權門思炙手淨掃一室安吾貧晝閱詩書夜星斗
休論生天與作佛靈運甘居丈人後吾儕慎勿慕富貴
鳴鼓定須攻冉有但願相從文字樂交情合向窮中厚
倚看前席坐間人平步登瀛叅二九

鄭遜志胡叔成謝鵬劉敦信萬廓鄔一唯和詩
復用前韻

前日中秋一壺酒交朋解散歸南畝把盃邀月止三人

中有客來從谷口鄭首登詩壇出險語張我孤軍真畏

友重陽佳句更奇絕西風猛向松關吼中庸伯始遥遥

胄胡穎然作賦吟詩手謝客篇章似春草分得家傳才

一斗謝句法天然自圓熟長慶詩豪今有後劉妙齡能

作老成語必大奇兒亦希有萬鄔郡太守司馬孫文與

其人兩溫厚鄔我與數子無薰蕕文字相從十常九

九日會飲予為唱首自和凡數篇皆因事叙情

爾未作重九詩也今再和一篇每句用事而不

見姓名末聯外餘皆略存對偶必有能和之者

獨坐東籬嘆無酒種秫西疇獲盈畝菊花叢畔來白衣
桑落杯中付饒口汝南風俗有故事龍山宴集多佳友
靜聞彭澤三徑香遙想藍田雙澗吼順時習射馬嘶風
隨俗登山囊繫手慈恩塔冷舊衣冠戲馬臺空古刁斗
三嗅馨香感慨中細看茱萸醕酹後應制賦詩人孰在
坐湖聯句今還有明朝見花心已別此日登高意宜厚
日月並應節物嘉獨恨今年無閏九

九日寄昌齡弟

九日嘉節也予坐無聊中不能自遣又念昌齡弟不在家為之悵然因誦唐王維詩云遙知兄弟登高處徧插茱萸少一人遂用其字為韻作十四絕并茱萸酒以寄之

憶昔逢重九登臨不憚遙弟兄同把酒行樂興飄飄去歲重陽日吾親窀穸期東籬自黃菊淚眼可曾知此日黃花酒深期酌弟兄誰知有離別西望不勝情

我有茱萸泝遙同輞川底登高少一人又是王家弟
嘉節苦難遇故山隨俗登未能如鄭谷一榻對高僧
白石登山客新詩句必豪寧容杜陵老獨步玉山高
我思鴈潭游欲與鴈行去羽翼本天生誰令分兩處
樂事苦無多良辰豈長見明年綴席時要使茱萸徧
庭前有晚菊青蘂未堪插開日即重陽歸來酒同呷
載酒觴黃菊登山臂紫茱重修汝南事災厄自今無
老去悲秋甚興來聊自娛明年知健否子細看茱萸

窮途嗟我衰中歲傷兒歿兄弟止三人尊前豈宜少
嗅菊謾勞三賜安得莫一聊分故園枝不負重陽日
節物豈不好吾家何太貧一尊聊爾寄重意媿先人

萬叔永誕日在孟秋乃以重九開燕俟佳節也
予不獲與稱觴之列作詩以賀

種德尤勝竇十郎靈椿未老桂先芳一門此去無疑大
五福他年未易量鳳穴生雛梧正碧龍山開宴菊初黃
吾鄉此會從來少恨不登堂舉壽觴

九月十二夜獨步梅溪翫月人迹悄然秋色滿
眼微風不動巖桂自香初不勞思偶得四句蓋
心境中靜時語也歸小成室對短燈檠索紙書
之

獨步溪頭夜初寂掃空塵念心清涼月明眼底見秋色
境靜鼻根聞桂香

前日寓邑偶值乍寒陳劉二生濟我以衣童生
濟我以衾既別為二詩以贈

肌體生鱗鬚颯毛衰年怯冷欲兒號無人來綻韓公襖
有友能施范叔袍入手乍驚儒袖濶披身尤喜義襟高
書生忍凍誰相顧共弊輕裘賴我曹

右贈陳元佐劉士宗

凜冽霜風夜薄人誰能煖我曲勾身寒欺三幅范衾陋
睡美一宵姜被新體粟不愁生旅舍鼻雷想見撼比隣
夢回却念君兄弟苦碓無眠痛慕親

右贈童偉侃

萬先之生兩男作洗兒歌賀之

君不見徐卿二子生絕竒熊羆入夢非同時徒煩孔子
與釋氏兩回抱送麒麟兒又不見昔日梁嬴亦雙乳生
止一男仍一女過期畢竟非其人未免終身亦妾圉鬱
葱佳氣充門閭龍穴盛事從來無莫階良月吐三策蚌
腹甲夜生雙珠相對抱持翁媪喜眉目分明巧相似慈
顏戲語綵衣郎汝子他年勝我子郎君拜舞笑答翁翁
生六兒年豈同何如今日一卮酒手抱兩孫頭未童二

雖慶誕相先後未省如何分長幼商家尚質周尚文
喚取何休細推究慶門蘭玉行滿庭伯仲叔季雙命名
他時四乳類周士森森八桂同敷榮我忝通家同筆硯
聞君得子歡無間殷勤為作洗兒歌覓取金錢三百萬

黃府君挽詞

不雜商山綺與園生涯占得小桃源平生隱德知多少
跨竈洗洗已六孫

紛然紛臂已成風一爨誰能再世同野史他年書逸事

定須記此富家翁

楊州別駕知名士，肝膽崔嵬百鍊剛。誰謂公家有蘭玉，

解令高選繼東牀。

劉黶，識道沂州人，令樂清，有政聲。後得楊卒以二女妻白石錢氏、黃氏。

齒髮如公自古稀，定應含笑九原歸。春風白石巖前路，忍見楊花作雪飛。

予自乙丑冬如臨安，赴補建，今凡五往矣。是行也，痛慈親之不見，傷幼兒之蚤死，登途泣然，因

成是詩。

八歲五行役茲行最感傷思親啼血淚憶子斷剛腸游
遠有遺恨鍾情難遽忘離家兩夜夢長遶白巖旁

初擬過雁山既而取道烏石寄夢齡昌齡

不度丹芳七七盤非緣杖屨厭間闕要留來歲高風便
兄弟成行過此山

過白溪

朝離黃塘憇烏石莫宿青江過白溪嶺上回頭觀赤水
山川五色望中迷

過盤山宿旅邸

一嶺迢迢十里賒
行人半日踏烟霞
青山遮莫盤千匝
歸夢何曾不到家

登皇華亭

不是四方銜命士
偶來亭上賦皇華
凭欄回首三百里
烟水茫茫思故家

宿浮橋

落日丹丘下
西江十里西
浮橋通古道
逆旅傍清溪
夜

靜水聲細曉陰山色迷吾鄉在何處天遠白雲低

與鄭時敏登樓把酒書二絕

十里青山接郡城危樓四望眼添明海冥天濶鄉心切
更聽飛飛鴻雁聲

登樓能賦非王粲沽酒忘形有鄭虔千里相從文字飲
不辭費盡杖頭錢

途中見早梅

山行初逢建子月始見寒梅第一枝遙想吾廬亦如此

誰能千里贈相思梅花發後思家切竹間水際橫枝出
暗香踈影和新月自是離情禁不得觸物那堪此時節
春前臘後定歸來要看溪上千株雪

乙丑冬西游觀南明石像作詩一絕至壬申十
月四日復往觀焉和前韻并書於佛閣

兒戲團沙欲象真誰將願力歷三塵八年來往蕭峰客
兩度來瞻百尺身

西征

紹興建元二十二良月壬午時丁未王家辭弟游帝都
出門滿眼思親淚鵲鴿送我過原隰朋友携尊宿蕭寺
朝離黃塘惜分別莫宿青山嗟獨自初心滿擬游雁山
行止非人輒乖異黃巖留連越三宿故舊過從日沉醉
鄭生伴我千里行近世人無此風義皇華亭上一回首
陡覺眉頭起鄉思西江十里浮橋邊把酒登樓吟擁鼻
山行初逢建子月入眼梅花已春意前觀三渡覺非舊
下視兩灘真可畏渡頭仙人還笑我髭鬚如棘猶名利

欲入天台觀石橋行來匆匆未能遂途中邂逅張老丞

廷玉

十五年前樂清尉自嗟吾非沈謝輩面目從來苦

難記飛泉枕上夢成魔達旦思家何曾睡細雨濛濛入

關嶺旅邸重尋舊題字雨脚微收過天姥洗出峯巒疊

蒼翠劉阮祠荒土猶赤溪山真是神仙地道旁石現小

金仙傳舍荒涼誰廢置柘溪竹染兒女痕石嶺松含棟

梁器路入南明觀石佛樓閣峒窈窕更深邃八年行役兩

來游巖上題詩記前事乘興剡溪尋故人久別相逢雜

悲喜義風吹水送行舟越國江山滿瞻視十四歲娥孝
且烈三百里湖明更媚千巖競秀壑爭流終日貪看趣
遙寄西興渡口聲如雷銀浪崔嵬魄驚悸江神為我風
色平天闕煌煌瞻象魏賢關訪舊話酸辛更食齏鹽舊
滋味學官欲以職事留自媿非才力辭避觀臺雲物端
可書宮線初長日南至龍山僦舍觀大禮儀仗森然典
文備人臣貴盛古今無秦公父子俱為使景靈告謝樂
聲回鵷鷺花枝侈君賜西游連日覩天顏和氣氤氳散

憔悴歲云莫矣却歸來捉筆書為于役志

梅溪前集卷五

欽定四庫全書薈要卷一萬五千八百四十二

集部

梅溪前集卷六

宋 王十朋 撰

詩

癸酉三月二十五日至剡溪旅舍觀曹夢良題
壁有撩我思家第一篇之句僕離家半月亦未
嘗作詩因次其韻

客舍那堪聞杜鵑夢魂驚斷竟無眠定知此境撩鄉思
我亦曾非第二篇

剡之市人以崇奉東嶽為名設盜跖以戲先聖
所不忍觀因書一絕

里巷無端戲大儒恨無司馬為行誅不知陳蔡當時厄
還似如今嵯縣無

周德遠植瑞香於牕前戲成一絕

主人貪睡為貪香花植窓前意味長見說有時魂夢裡
化為蝴蝶遶花旁

游明心院

精舍傍脩嶺道心隨眼明泉餘偃公迹

偃公泉

山接剡溪

城無雨竹亦淨有風松更清誰名上方閣撩我欲歸情

歸鴻

閣

游圓超院登挾溪亭次盧公

天驥

韻

路入剡山腰風生玉川腋孤亭物外高雙溪眼中碧山
僧作亭知幾春賞音端怕逢詩人自從妙語發丘壑遂
使絕境多蹄輪我來首訪維摩詰問訊雙溪自何出發
源應與婺溪同賦物慙無沈郎筆凭欄欲洗名利塵入

眼翻驚客恨新山城重重水如帶可能挽住思鄉人

寄夢齡昌齡弟

老去生涯集百憂一身萍泛剡溪頭釣魚溫水同侯喜
旅食新豐類馬周長缺有時思海味短檠終夜照離愁
也知四海皆兄弟能似天生羽翼不

高和叔生日

高標綽有魯王風天為勲門慶誕公揮塵笑談傾坐上
傳家韜畧蘊胸中暫從剡水高人隱行繼澶淵蓋世功

長願紅顏似今日壽尊鯨吸百川空

天子始締

盛德方居火天王始服締薰風生殿早畏日到宮遲瑩
雪羅初疊含風葛乍披汗寧濡玉體暑不近天肌表飾
遵尼父恩榮被拾遺中宮同儉德無媿葛覃詩

淵源堂十二詩

淵源堂

像貌崇賢聖名言訓子孫日親師與友力學探淵源

細論堂

不飲紅裙酒祇將文字論江東渭北客日日對芳尊

宜桂軒

主人端不俗景物亦相宜手種軒前桂聯芳共幾枝

蘊秀軒

剡溪蘊秀異久鬱少陵詩今向軒前看人如晉宋時

同襟館

安道家何處溪山深更深扁舟不憚遠得得訪同襟

富學齋

金玉本非富詩書元不貧平生無盡用學問在吾身

輝聲齋

功名就烜赫遺訓可能忘待獻明光賦蜚聲滿四方

集彥齋

獨學恐孤陋要須親友朋虛齋集羣彥共對短燈檠

擢秀齋

好似東山謝滿庭芝與蘭義方能不倦擢秀固非難

恢義齋

憶昔杜陵老恨無千萬間君能恢大義吾黨悉歡顏

蘭馨室

一室雖方丈游從必舜徒芬馨不自覺身化與之俱

足鯉池

堂上論文客異時還索居池中鯉魚足好寄別來書

書院雜詠

牡丹

今古幾池館人人栽牡丹主翁兼種德要與子孫看
芍藥

已過花王候纔聞近侍香來遊禁酒地免作退之狂

巖桂

巖桂何時種遙聞月窟香君家似燕竇會見五枝芳

江梅

園林盡搖落水雪獨相宜預報春消息花中第一枝

酴醾

日烘香倍遠雨浥韻尤清誰把玉錢比恐花羞此名

紅梅

桃李莫相妬天姿元不同猶餘雪霜態未肯十分紅

海棠

欲與春爭媚嫣然一笑芳雨中如有恨疑是為無香

瑞香

曾入江南夢故宜名瑞香何人好談論雅目誤更張

菊花

不恨開時晚自知能傲霜慎毋同瑣細采擷上君堂

蠟梅

非蠟復非梅梅將蠟染腮游蜂見還訝疑自蜜中來

榴花

客館逢重午石榴花正芳吾廬開亦好歸去嚼天漿

簷蔔

禪友何時到遠從毘舍園妙香通鼻觀應悟佛根源

千葉黃梅

菊以黃為正梅惟白最佳徒勞染千葉不似雪中花

千葉紅桃

在處飄紅雨臨牕照夕陽何時清禁裏一笑伴仙郎

千葉白桃

豈有天桃艷淡然羣卉中全身是清白那肯媚春風

佛見笑

學得醪醖白更能相繼芳金仙粲然笑鼻觀不多香

荷花

十里西湖上紅雲照綠波何如吾淨友臭味不須多

蓼花

秋色在何許蓼花含淺紅客情禁不得歸興逐西風

萱花

有客看萱草終身悔遠游向人空自綠無復解忘憂

斑竹

蒼梧巡不返斑竹至今存今日稽山下幾枝忠孝痕

燕竹

問訊東牆竹佳名今始知龍孫初迸日燕子却來時

西河柳

瀟洒西河種誰移向浙東青枝太纖細莫近楚王宮

葡萄

珠帳臨簷掛龍鬚滿架抽也知堪釀酒不要博涼州

芭蕉

草木一般雨芭蕉聲獨多主人裁未足其奈客愁何

石菖蒲

天上玉衡散結根泉石間要須生九節長為駐紅顏
慎火草

禁殿安鷓尾騷人逐畢方何如栽此草有火自能防
盆中新荷

首夏盤池裏新荷點數圓主人行中選故為作青錢
假山

君有好山僻疊山亭院間不遮山外眼又得見真山
盆池

不比兒童戲埋盆作小池要令盆底水長滿不傾欹

書架

君富端不俗有錢長買書家藏三萬軸不怕腹空虛

鶴

雅志在冲霄長思振羽毛風前忽相和聲徹九天高

鵝

善鳴聊自適不願遇知音深恐山陰媼誤猜君子心

花鴨

毛羽不多異浪於花得名深疑杜陵誤黑白未分明

鷓鴣

文采真為累飛鳴不自由小池新水漲相對謾沉浮

剡溪雜詠

剡溪

千古剡溪水無窮名利舟間乘雪中興惟有一玉猷

了溪

禹迹始壺口禹功終了溪餘糧散幽谷歸去錫玄圭

挾溪亭

遠水從台婺同歸古嶧州
巍亭壓山頂千古挾雙流

龍宮碑

曾到龍宮寺拂塵觀古碑
何時無短李肉眼可能知

戴顓墓

曠野冢纍纍子孫猶不知
千年戴顓墓三字道旁碑

阮仙翁宅

再入山中去烟霞鎖翠微
故鄉遺宅在何日更來歸

戴溪亭

剡水照人碧剡山隨眼青
我來非雪興慙上戴溪亭

偃公泉

泉自何時有得名從偃公誰能繼
張陸為載水經中

書院掛額展筵雅會也戲集諸堂軒齋名作詩

黌館名初掛銀鈎勢欲翻人才蘊秀異學業扣淵源
俊彥方羣集文章可細論輝聲邁前輩擢秀藹諸孫
心友居蘭室天香滿桂軒茲為學者富難與俗流言
恢義高

風倡同襟舊好敦池中神鯉足一一上龍門

別周德遠諸友

山城過踈雨客館生新秋鄉心雜病思浩蕩不可留憶
昨初來時園花弄春柔俯仰節物變木杪風颼颼旅食
百日餘故人情已周論文有深味惜別添牢愁槐花物
色老琴書散交游暖律回南枝相期泛仙舟

宿石佛

七月二十三日回自剡中宿石佛摩雲閣時與謝圖

南童文卿沈齊卿黃庭甫子楊同行周德遠德貽德
廣陳少曾史巖起携具餞別

脩徑入幽壑梵宮摩碧霄仰頭驚突兀跬步怯岑堯寶
相石間湧鐘聲雲外飄明朝路南北身世各塵囂

白若遇水以小舟從石門渡勢危甚因書數語
示圖南文卿時八月二日也

歸途阻秋潦溪漲不可涉迂從石門渡未見心已怯壯
我龍伯宮幽據鴈山脇巖如峙城壁南北本相接衆流

欲朝宗天為開岌業泓澄潭百尺艤碗舟一葉吾生何
自輕內顧無可挾所賴二友生千里同負笈忠信儻可
仗免作飛鳥帖來歸從剡溪山水頗涉獵石齧天台舟
浪拍臨海楫可曾如此境令我魂震懾連年作行客川
塗但取捷不因風雨暴誰瞰遠步屨茲渡雖云惡觀覽
意亦愜謾賦石門篇添入剡游篋

孟甲生日

記汝初生際燈花達旦然門闌增喜慶翁媪最矜憐已

過周天歲行臨志學年勉修愚魯質詩禮稱家傳

孟甲孟乙好蓄古錢因示以詩

世人多好錢今汝獨好古書中閱平準壁上按圖譜廣
拾漢五銖遠及周九府惜哉生我家此物罕曾覩百中
時得一喜笑見眉宇所蓄雖不多其志頗可取閭閻富
家子繞牀堆阿堵一字不識丁碌碌何足數更宜移此
力典墳讀三五縱未到聖賢定可過乃父

周光宗贈螭房報以溪蓴

珠嶼蠟房魁海錯左原蓴線冠溪毛韓公南食可曾見
張翰東歸徒自高鼎俎珍庖輸肉食江湖佳味屬吾曹
有無相易通家事僮僕往來毋憚勞

劉府君挽詞

全之父

歆向詵然萃一門過庭詩禮盡公恩竒兒不負義方教
舊治至今遺愛存心境欲明憑貝葉壽藏預卜傍祇園
髯郎行燭青藜杖定見榮光達九泉

賤子無天釁早鐘記觀先友涕亡從士林方喜榮三桂

丞舍俄驚慘二松剡水淒涼回棹速丹丘慟哭過車凶
發揚門戶勝他族深羨公家有蔡邕

賈府君挽詞 予妻父

鹿巖重見鹿門翁襟宇渾然太古風負郭良田全種德
起家難弟已收功花間麟冢經年就木杪龜趺指日豐
門婿自慚非李漢鄙文何足狀韓公

陳夫人挽詞 予妻母

偉節聲名蓋一時夫人淑德最相宜便甘布素從高隱

不惜花鈿極衆饑，萱草未乾堂下土。楊花已應夢中詩。

如今多少王孫餓，進食哀憐復有誰。

賈公夢中嘗得詩云：洞房人不見，相

望摘楊花

納涼偶成

架松却煩暑，梳竹來清風。頑然七尺軀，寄此微涼中。高枕傲有道，深杯醉無功。山林有餘樂，此興誰吾同。

悼演述二老僧

疊石峯前二老僧，相逢一笑見真情。社中對酒日初永。

林下圍碁秋始清尚擬維摩眠丈室遽驚圓澤厭浮生
通幽亭冷西樓古過客傷心涕淚橫

黃楊

黃楊紀孝義也家有黃楊根一榦百枝葉森然木之有
義者也故作是詩以記之

嘉彼黃楊鬱焉其蒼匪甕而圓匪蓋而張百榦同根森
如弟昆千枝其子萬葉其孫惟此黃楊先子所植草木
有義先子之德願言我家兄弟子孫如此嘉樹永為義

門

卷六

梅溪前集卷六

欽定四庫全書薈要卷一萬五千八百四十三

集部

梅溪前集卷七

宋 王十朋 撰

詩

林下十二子詩

并序

梅溪野人既見黜於春官齒髮老矣悟虛名之可厭知
林泉之足樂也家之東南隅有井焉泉清而味甘井畔
有脩竹數百挺闢小徑以通幽有梅數根歌卧乎竹間
兩桂蒼然夾井而植因蒔蘭于竹林之下植昌陽于井

旁以增野趣予與賓友杖屨徜徉賦詩飲酒弈碁于其
間頗足自適遂命曰林下七子且字竹曰子脩井曰子
深梅曰子先桂曰子蒼蘭曰子芳昌陽曰子仙梅溪野
人為之主故自字曰子野仍賦七詩以寓意牡丹芍藥
花中之富貴者桃李艷而繁凡紅艷之屬俱非林下客
也皆不取予既醉而卧夢有五人來謁自稱黃公丁公
柳先生三徑居士三槐公子予延之坐黃公乃前曰聞
主人有林下之游與六子為友褒之以名字寵之以詩

章亦一時之雅致也某雖不才然封植于君家久矣獨不與茲選何耶予曰予非敢忘公也然所取者皆井竹間諸友公所居差遠予與客游林下而公不在眼故不與焉爾黃公粲然曰主人欲隔籬牆分尔汝耶予媿其言許以嘉客處之丁公踵進曰主人昔有幽居三詠某與黃公竹生與焉今竹生首與林下選黃公亦辱千金之諾矣主人苟未忘壁上語願以某處坐客之未可乎言未畢柳先生三人俱進皆有請焉予悉領之既覺而

思此必吾家黃楊丁香槐柳菊也予不可食夢中言遂
字黃楊曰子嘉丁香曰子素柳曰子春槐曰子夏菊曰
子秀復賦五詩以贈之通前九十二子焉時甲戌孟夏
也

竹子脩

萬木蕭疎怯歲寒子脩相見喜平安世間寧有揚州鶴
休訝平生肉食難

井子深

度量泓泓井子深客來車轄總能沉定須再築新亭覆
不負先君好事心

先人昔嘗以亭覆井目曰投轄

梅子先

竹外溪頭手自栽羣芳推讓子先開好將正味調金鼎
莫似櫻桃太不才

桂子蒼

學仙深愧似吳郎賴有吾廬兩子蒼疑是廣寒宮裡種
一秋三度送天香

蘭子芳

國香入鼻忽揚揚
知是光風泛子芳
林下自全幽靜操
縱無人採亦何傷

昌陽子仙

天上星郎字子仙
結根拳石傍清泉
豨苓方入鑿師手
誰識仙姿解引年

黃子嘉

保綠軒前黃子嘉
非松非栢亦非花
故應喚作思人樹

數十年前閱我家

丁子素

雨底含愁雪裏芳
琉璃葉映小何郎
世人競重熏籠錦
子素何曾怯瑞香

柳子春

夾道青青柳子春
自從栽植幾番新
如今已作參天樹
應笑衰遲老主人

槐子夏

方苦炎炎畏日長
欣蒙子夏惠清涼
三槐雅是王家物
為榜新亭擬舊堂

菊子秀

子秀霜中色更嘉
金錢粲粲滿庭堦
淵明異日開三徑
端仗茲花慰老懷

王子野

場屋虛名且罷休
歸來聊效晉人游
林間諸子總非俗
肯與野人為友不

昌齡闢圃植花索詩於老者戲作數語兼簡夢
齡

東園小小花木稀西園廓廓規模竒西園主人但置酒
東園老人甘賦詩朝游西園飲千斛莫向東園吟百幅
更約南園好事人酒盞詩篇日相續

西園新闢昌齡索詩子以其未開尊也戲作數
語既飲復用前韻

阿連好事由來稀開軒闢圃幽更竒峯巒羅列富遐覽

氣象收拾歸新詩百挺琅玕花數斛宛似輞川圖一幅
朝莫過從有弟兄長願歌聲無斷續

子與二弟連日賦詩飲酒詩成命二子書之亦
居家之一樂也復用前韻

不愁地僻車馬稀自喜兄弟俱好奇阿連舉觴勸我酒
阿買研墨書翁詩長泛鄭生舡百斛日賦鄴侯三四幅
何用身封萬戶侯但願青箱有人續

昌齡和詩以不得志於賢關有欲退隱之語復

用前韻勉其涵養俟時未可真作休休計也

出門休歎知己稀
開卷攬取前人奇
西園松菊聊笑傲
未可遽賦休休詩
涵養胸襟容萬斛
仰視青天紙盈幅
行看富貴來逼人
江左家聲子當續

昌齡頻開尊再用前韻

人生常患如意稀
利名擾擾何足奇
誰能如我惠連弟
有園有酒兼能詩
種秫西疇都幾斛
時見小童馳片幅
風軒洒掃又相呼
適有嘉魚饋羊續

用前韻題東園

吾園小小遊人稀
吾腹便便空自奇
徑草青青可煎飲
雨竹涓涓堪賦詩
鮮鮮菊滿東籬斛
揚揚蘭入騷人幅
牡丹芍藥紫薇梅
四時花卉開相續

賈元識和詩酬以前韻

河東丈人年古稀
精神矍鑠心瑰奇
新來移居向山谷
一尊時得同論詩
酒量汪汪可勝斛
醉後揮毫動盈幅
新詩疏越似朱弦
不才何用煎膠續

次韻昌齡西園即事

世態蠅營已厭驅小園初闢稱幽居
杯深轉覺利名薄心靜更宜花木疎
窓几吟餘山色好軒齋夢覺日華舒
尤憐不棄東園老時復相從辨魯魚

東園小閣丹粉一新昌齡有詩次韻

小園小閣無竒新但喜有酒堪娛賓
西疇種秫可自釀不用勤買拋青春
月明星稀烏擇木吾愛吾廬堪寓目
須知主父五鼎珍不似王猷數竿竹
丈夫未遇當安貧

帶經且作鋤園人詩酒過從老兄弟一笑可破雙眉顰
見說西園相繼闢好將因果同栽植子孫清白世相傳
莫同阮氏分南北

夢齡得男老者喜甚湯餅會中出詩以賀

梅溪佳氣夜葱葱果得竒兒應夢熊湯餅笑歡良不淺

桑弧時節稍相同

子以十月二十八日生
猶子以二十九日生

喜將老眼看

猶子首出新詩賀乃翁從此吾門如謝傳芝蘭玉樹滿

庭中

予有書閣僅容膝東有隙地初甚荒蕪偶於暇
日理成小園徑以通之杖藜日涉於其間幾欲
成趣然花木蕭疎不足播之吟詠謾賦十一小
詩以記園中之僅有者時甲戌仲冬也

小小園

預作休休計先開小小園
杖藜成日涉得趣與心論
便便閣

一閣僅容膝閉門塵慮捐
讀書心已懶高卧腹便便

青青徑

小徑循園闢青青草色都主人猶未仕時得理荒蕪

娟娟林

遶舍種脩竹清風長滿筵天姿本來淨不雨亦娟娟

揚揚畹

九畹何人種光風泛國香林間今幾許鼻觀日揚揚

鮮鮮砌

吾圃豈不富黃金無數錢誰云何用好霜裏白鮮鮮

牡丹

人道此花貴豈宜顏巷栽
春風情不世紅紫一般開

芍藥

十花稱近客千葉重維揚
世上無姚魏還他霸衆芳

早梅

北陸寒未半南枝春已回
方於雪中種便向雪中開

雙竹

本是一根出相期同化龍
慎毋輕剪伐雲路定相從

紫薇花 俗名滿堂紅

盛夏綠遮眼茲花紅滿堂自慚終日對豈是紫薇郎

梅花次賈元識韻

南枝昨夜暖先回壓盡羣芳獨自開仙客風中飄素袂
玉妃月下試新裁未憑驛使殷勤寄首辱新詩特地來
明日雪晴須共賞為花拚却飲千杯

歲暮雨雪連作稍阻會集賈元識有詩次韻

自從春色上孤根淫雨經時步不前愛日未能供宿潤

愁雲依舊蔽青天溪山咫尺成千里棋酒因循又一年
今夕藍輿定相過尊前行樂興無邊

萬府君挽詞

字德昭子從舅也

東平隱君子當以古人看孝却豺羣易恩全雁序難人
如心畫正度勝酒腸寬粲粲三株樹門闌已壯觀

老成嗟不見里巷尚能談衣解因周急簪還務激貪蹶
蹄心不愠折翼淚常含瞑目應無恨聲名與佛參

吾母昔逝難携孥依舅舫態多朝暮警言恩獨始終全濫

與高門出尤蒙長者憐未能成宅相徒有淚如泉

林府君挽詞

我昔遊庠序宙緣識令孫雅知苗裔遠更喜典刑存俗
子猶遷善偷兒最感恩佳城明日閉墮淚滿江村

表兄璐挺二道人以山茶一根見贈植于便便
閣前每黑甜餘開窓寓目茗椀不捧精神自清
因成小詩

一枕春眠到日斜夢回喜對小山茶道人贈我歲寒種

不是尋常兒女花

又覓沒利花

沒利名嘉花亦嘉遠從佛國到中華
老來耻逐蠅頭利故向禪房覓此花

二道人以抹利及東山蘭為贈再成一章

西域名花最孤潔東山芳友更清幽
遠煩丈室維摩詰分韻小園王子猷
入鼻頓除浮利盡同心端與國香侔
從今日講通家好詩往花來卒未休

抹利見佛經名義未究或云沒者無

也謂聞此花香者令人寬悟而好利之心沒故前作沒利此作抹利姑兩存之

覓海棠

壽昌文郁師植海棠二根于所居舫齋之旁予偶以社日訪之啜茶既罷開窓賞花時烟雨初霽竒葩正芳嫣然在軒檻中殊有佳韻越五日作詩寄之且欲覓一根種于小園中朝夕觀賞庶無忘高人雅致時紹興乙亥

好事高人重海棠兩株分植舫齋旁恰當燕子來時放

更向禪房深處芳道眼想應憐不俗癡人何苦恨無香
梅溪野叟曾經眼欲覓一根栽草堂

郁師贈海棠酬以前韻

珍重高人贈海棠殷勤封植弊廬旁固宜花裏稱名友
已向園中壓衆芳萬樹總含兒女態一根獨帶佛爐香
杜陵應恨未曾識空向成都結草堂

札上人許贈山丹花且云此花三月盡開俟藥
成移去至上巳日以詩索之

人間花木眼曾經未識茲花狀與名丹却青山暮春色
續他紅樹墮時英梅溪野老栽成癖蓮社高人諾不輕
小小園林綠將暗早移芳藥看敷榮

表弟津上人有瑞香抹利戲覓之

瑞香早入江南夢抹利來從毘舍園久與道人同寂寞
不來薦孔融尊

覓季仲權碧桃

紅雨紛紛空自繁碧雲一朶勝桃源君家獨有神仙種

分我鬧花深處根

覓季仲達醪醪

名園羽蓋謾童童不似青虬出甕中
好事主人仍好施
定移韻友乞山翁

和寶印叔送春二絕

潛澗園林幽更竒送春歸去有新詩
風光流轉身長健
又見明年花滿枝

青春不覺去堂堂把酒誰分此日光
偶讀高人送春句

味回齒頰有餘香

族兄文通贈山茶

野性無端喜種花
吾兄得得贈山茶
鶯聲老後移雖晚
四月始栽鶴頂丹
時看始嘉雨葉鱗鱗
成小蓋春枝艷艷首
羣葩自慚欲報無
瓊玖來往同看本一家

兄弟隣里日講率會
因書一絕且戒其早納租
稅也

屏跡山林頗自安
里閭率會有餘歡
但須及早輸租稅

不用低顏見長官

萬府君挽詞

字叔永庚子登科

前輩風流久之人尚典型抱才雖汨沒種德自芳馨養
浩眠龍穴流光屬鯉庭鄉評比燕竇所欠獨年齡

太學稱多士竒兒占上游賢書連得雋舍選復居優善
教由孤突興家出萬脩板輿游未遂風樹已蕭颯
屈指吾鄉黨如公今幾何門猶畢萬大男類陸終多壯
志埋蒿里幽光發薤歌河梁嗟未就遺恨滿滄波

張廷直挽詞

意氣軒軒蓋一時牀頭周易造深幾芹芳泮水聲蜚早
花滿河陽迹到稀方外客携因果去道旁人汲義泉歸
柳川池館規模壯一夕花妖世已非

梅溪前集卷七



總校官庶吉士臣侍朝

校對官中書臣金光悌

騰錄舉人臣秦朴

騰錄監生臣俞鳳

欽定四庫全書薈要

集部

梅溪前集卷八至
十

詳校官助教臣謝登雋



欽定四庫全書薈要卷一萬五千八百四十四集部

梅溪前集卷八

宋 王十朋 撰

詩

左原紀異

樂清之東地名左原中有古井深數丈時冬旱水枯

泉僅盈掬有女子數人提甕而汲綆絕甕墮俄有男
子銳然解衣入井取之既而石陷聲震山谷井深而
石重咸謂壓者必齏粉矣越三日事聞于邑尉周公

以職事來環井而視惻然嗟悼命役夫具畚鍤抉石
取骸將以葬焉自旦逮午猶未及尸俄而役者驚相
告曰井底有聲其鬼物乎公曰此陷者不死須吾以
生於是捐已資募能出之者衆力爭奮頭顱稍露而
語可辨矣土石撼動勢將復壓救者驚潰公乃整衣
焚香叩井而拜命工植板以捍石危而不墮益以緡
錢啗役夫俾蹈死以救公未飯吏以進卻之曰必活
人而後食日沒井昏繼之以燭用長綆繫衾挽而出

而觀者數百人謹呼震動嗟異其事且以手加額曰
公真仁人也能活人如此某家左原去井所為近獲
終日從公于井旁目擊其事作詩一篇以紀之時紹
興乙亥仲冬四日也公名邵字嘉成婺州永康人

君不見溫公年方髫鬣時奮然擊甕活小兒至今遺事
在圖書活人手段良可竒又不見耿恭昔年困疏勒孤
城鑿井踰千尺整衣一拜精誠通俄頃枯泉飛為液樂
清有地名左原地幽井古知幾年一朝陷溺誰氏子萬

石壓腦沉黃泉路隔幽冥生望絕三宿沉魂豈能活鬼
神莫救功莫施天遣仁人為之出彩棒來臨驅五丁抉
石求屍俄有聲頭顱半露語未辨人疑鬼物相視驚拯
溺辛勤功未果土圯石歌紛欲墮爭言陷者不復生救
者徒遭顛壓禍梅仙惻然臨井旁焚香再拜祈彼蒼散
金募衆蹈死救手植板榦加隄防土石相銜危不倒壑
粉餘生僅能保湏臾奪命鬼窟中萬口謹呼喜填道翁
然輿論咸竒公異事行將達帝聰感物誠居耿恭上活

人手與溫公同况公才學俱超絕吏隱那能久淹屈使
君前日飛鸚章莅事詳明已廉潔鯁生桑梓居此間具
書目見非妄傳太史採詩儻見取願付銀筆書青編將
見大書特書屢書不止此史筆芬香此其始

法燈俊上人惠杜鵑花

杜鵑嘉樹狀非常久向緇林壓衆芳春去尚疑啼蜀魄
客來還錯認丁香

比與諸公同游法燈有
錯認此花為丁香者

高人好事栽

蓮社野叟移根植草堂習氣未除端自笑賞花街惠意

難忘

法燈聞上人和杜鵑詩酬以前韻

道眼相看頗異常
遙遙蓮社有遺芳
兩篇詩好無疏氣
四季花然帶佛香
杖錫何時離竹徑
尋山莫惜訪槐堂
小園花疏煩題注
詩往花來未可忘

孫先覺母夫人正月四日生時年八十

丙子

莫開四莢瑞新春
瓦弄幽閨應此辰
蛇虺夢中祥女子
鳳凰占裏吉佳人
平生不負三從義
老去兼全五福身

他日竒兒亦黃髮捧觴猶得壽慈親

明慶懺院上方地爽而幽蓋精藍之勝也子因
會友託迹於其間一日探囊中得石刻詩一本
乃王瞻叔國博先生題台人秀野堂也摹寫景
物頗類於此因置之壁間意有感觸遂借其韻

二月二
十五日

下惟精舍遠塵繁境靜心清事不關案上忘機有黃卷
眼中得趣是青山林泉欲共高僧老事業未容吾輩閒

準擬他年掛冠後飄然杖履白雲間

懺院種蘭次寶印叔韻

偶向緇林植子芳光風入院泛幽香他年倘免芟鋤患
餘馥猶堪供道場

不放凡花染道場故栽芳友伴支郎一盤喜遇高人賞
却勝家園十八香

次濟上人韻

老來未厭短檠光又集青衿就故鄉却荷道人能具眼

不同時輩有他腸
心傳潛澗源流別
首出新詩意味長
我亦筆頭為佛事
未應中國異西方

玄鳥至

昆蟲方啓戶玄鳥亦知辰
去自百風候來逢化日春
深條烟雨濕廣厦羽毛新
故壘尋遺跡雕梁拂舊塵
早鶯宜結友秋雁不同賓
嘉爾能知義無忘舊主人

陳希仲贈山茶

都勝名花入小園
羣芳無復敢爭妍
童童翠蓋藏春色

艷艷繁燈照雪天青藥似開吾輩眼高標不染俗流緣
此花端有歲寒意好賦甘棠蔽芾篇

酴醾次賈元節韻

春山杜宇喚人歸歸見酴醾滿架垂葉底半開千顆白
鬢邊斜插一枝奇園林綠樹成陰後亭院青春欲老時
把酒對花歌數闋濡毫更和鹿岩詩

覓海松贈僧希月

海石真宜植海松青青不改四時容道人妙得栽培力

乞與書齋待化龍

浴佛無雨

俗言浴佛天必雨今年浴佛天愈晴招提鐘磬集梵侶
世尊塵埃思一清紛然膜拜口誦偈舉頭看天紅日明
或云天意與佛拗老行者云天與佛打拗不放雨師龍伯行天雖

不雨佛亦浴誤此億萬蒼生情廟堂何人職調燮勸天
與佛無使爭沛然一雨四方足億萬蒼生俱沐浴

喜雨用前韻

去年春夏人苦雨今年春夏人厭晴水枯秧老農務急
霈然膏澤來太清小民易怨亦易喜不知天意常分明
何須頻禱應上公但起夏禹陳五行五風十雨堯舜世
自古天意緣人情今茲一雨荷帝力龍神社鬼無妄爭
南畝有餘人意足蠶已三眠更三浴

雨止復用前韻

水枯秧老農欲雨麥黃桑綠蠶欲晴一朝大霈滿四澤
雲收霧掃天還清日暘日雨豈人力聖德仰荷吾君明

廟堂況無癡宰相不怕泥濘妨牛行布穀催耕最知務
鳴鳩呼婦殊有情平原出水雲吐日陰陽得所無戰爭
明日陽光照臨足今日陽烏已先浴

孟夏十有一日時雨初霽晨登高閣極目四望
烟銷日出氣象一新復用前韻

蝶夢驚回聽殘雨鳥聲喚起欣初晴梵宮烟火帶餘濕
黌舍几席生微清披衣登閣忽四顧頓覺遠目增雙明
樵漁款乃霧中出舟楫蕩漾田間行清和節物滿眼界

柳垂暗綠花會情窻明几淨日漸永天開地廓陰不爭
俯視滄浪堪濯足遙看扶桑觀日浴

再用前韻勉諸友

蠶婦欲晴農欲雨書生事業無雨晴况茲長日足可惜
薰風入戶精神清虛窻文字遮眼暗短檠燈火通宵明
紙為良田力耕穫一廛稼穡嗤許行太山北斗仰韓子
千態萬狀窮周情羣居涵養務渾厚藩籬剖破銷紛爭
拭目天衢驥驥足下視汙池雀兒浴

穎師贈榘栽

自從兒時食大榘思欲移根向鄉里年來花木浪經心
品色徒多真戲耳道人贈我方外根不比尋常桃與李
枝柯宛類秦大夫功效端如使君子殷勤栽植同因果
衆目紛紛等奴婢他年摘實薦新時杖屨相從蓮社裏
月上人以拳石植海松時菖陽於四際蒼姿秀
色鍾清氣于几案間以為梅溪之野人贈蕪惠
詩章因與酬唱凡四首

蒼蒼千尺大夫松不似湖嵌植小龍枕水一拳形翠崑
凌雲三榦色尤茸玉衡星化姿兼茂蓮社詩高席可重
乞與書窓端不惡蕭然如對德人容

處士何須種七松賸栽海上綠髯龍靈根頻灌蒼如玉
黛色初抽軟似茸蘸水小山形鑿鑿引年菖歎節重重
道人分得歲寒種一洗梅溪憔悴容

禪杖西游覩萬松歸栽九節伴蒼龍何須偃蓋藏龜甲
自可延年勝鹿茸贊老房幽看更好畫公詩險和難重

為師旦旦加澆濯不遣塵埃上綠容

澗毛纖細蔭青松會見成仙與化龍孤嶼兩峯多臭味

孤嶼多一莖九節異香茸羨師得句侵澄觀顧我談經

媿叔重明日還家帶滄海園林小小可能容

懺院種紅蕉用寶印叔韻

新植靈根續蕙蘭緇林佳處占清閒深紅應費化工染
濃綠疑從帝所頒正色可曾娛俗眼晚英猶足慰衰顏
它年解組歸三徑多種青青滿故山

題佛閣三絕

佛閣閱人久，儒官涉世疎。
伽藍真長者，容我半年居。
桑下不三宿，閣中經半年。
青山滿庭戶，雖好莫留連。
靈運本狂客，偶來蓮社遊。
鐘魚聽已厭，歸去故園休。

題郭路莊

南山有井名黃花，我卜別業臨其涯。
酌泉漱石思往事，天遣景與名俱嘉。
東籬採菊隱君子，悠然凝望南山賒。
茲人高躅已千古，三徑蕪沒堪咨嗟。
我生本抱丘壑尚。

誤涉塵世爭浮蝸十年太學志未遂歸來隴畝躬桑麻
草莊新築亦不惡青山遠近光交加會須移住效杜老
終賦歸去師陶家新涼入郊九日近西風漸欲吹烏紗
龍山風俗有故事撩我清興凌烟霞

率飲亭二十絕

吾門非北海安得客滿坐有亭名率飲鄰里日相過
蒼頭稍知耕赤脚頗能釀有田俱種秫我日坐亭上
幽亭濶方丈脩竹種千百有時人不來影月為吾客

富貴有天命安貧士之常聊為真率飲未用利名忙

老去識交情興來懷酒伴山林車馬稀風月壺觴滿

文舉客滿坐淵明酒盈尊雖無古高躅妙意亦常存

文字粗能飲聖賢時復中林間十二子賓主自清風

富飲不解文翁意非在酒三盃聊遣興一醉豈緣口

我游醉鄉中常在軟飽後誰脩醉鄉記添我姓名不

吾家數兄弟薄有古人風生計何曾足酒盃無日空

右十絕書于左墻以坐上客常滿尊中酒不

空為韻

我性野而率山林謾求安有酒固可樂無酒亦自寬
亭上可率飲林間宜率吟每於詩酒裏寓我率然心
結交雖不泛絕物亦何曾莫問親疎客過門無不應
交游聚散中身世浮沉裏觀書悟昨非把酒知今是
有酒或無客有客或無酒何時此亭中客酒兩常有
是非何足論詩酒謾消遣但把無它腸聊為在家善
燈火散交遊園林寄幽興萬事付無心隨緣不求勝

心向靜中求身宜閒處著閣已號便便亭宜名莫莫
吾家老兄弟杖屨日相過對酒懽無限論詩味更多
有口但飲酒無悰亦作詩它年宦南北還憶在家時

右十絕書于右墻以寬心應是酒遣興莫過

詩為韻

橫山連氏妻方奉姑甚謹姑死刻木像事之越
十年不怠郡守張公子韶下車命諸邑訪孝義
予被牒至其家獲觀木像感歎不已因書四十

字時紹興丙子七月十四日也

純孝世稀有事亡人所難堪嘉里曾子况有婦丁蘭守
令方尊禮鄉閭競聳觀名將聞帝闕旌表及門闌

登姚輿嶺望家山有感

昔年度茲嶺回首念慈親如今望雲處惟有淚沾巾

題驛輿張店思周光宗

憶昔同行宿此村重來堪歎止吾存芙蓉雁蕩重經眼
舊事無人與共論

度雁山

雁山五經眼茲行尤可觀初冬天氣佳雁歸山未寒有

日照幽谷無雲翳層巒入境見祥雲

祥雲峯

振衣登馬鞍

馬鞍嶺

瀑水飛玉龍

兩龍湫

羽旗尊翔鸞

展旗峯翔鸞峯

石柱屹天

外天柱峯

卓筆書雲端

卓筆峯

靈峯觀石室杖屨穿巔岼山

禽知我來好音若相歡

登羅漢洞有禽鳴絕頂聲極可愛

羣峯列春筍

丹青狀尤難

靈峯新創丹青閣

行色媿匆匆更約它時看

度謝公嶺

十年九行役屢經此山中愛山不厭觀每媿行匆匆大
士瞻矩羅騷人思謝公一生看不足語如白頭翁

臘日與守約同舍賞梅西湖

西湖處士安在哉湖山如舊梅花開見花如見處士面
神清骨冷無纖埃不將時節較早晚風味自是花中魁
暗香和月入佳句壓盡今古無詩才武林深處景益勝
十里眼界多瓊瑰北枝貪睡南枝醒杖屨得得撓出來
旅中茲遊殊不惡况有佳友銜清杯手折林間一枝雪

頭上帶得新春回

同舍再約賞梅用前韻

梅溪野人真野哉老眼長為寒梅開
朅來西湖探春色濡毫一洗胃襟埃
却將梅花比和靖花與人物俱奇魁
同行二十五佳客一一盡是離騷才
新詩一出花價長穠秾桃李奴
玫瑰湖山已槁處士骨風月未厭吾
儕來欣聞好事約重賞準擬飡玉
嘗春杯預辦長戔收白雪載取十里
清香回

前日探梅李元翁以疾不往和詩有玉華野人
多病惱獨守寒爐煨芋魁句復用前韻約同賞
西湖十里真佳哉百花未放梅先開吾儕好事頗成癖
探春不憚衝風埃李生不出苦病惱書閱肘後占河魁
膽瓶相對數點雪錦腸寫出飄然才人如西湖有涵養
句與和靖爭奇瑰重尋勝游有新約湖山準擬詩仙來
寒爐蹲鴟不必煨為花痛飲拚千杯願君及早理杖屨
莫令立馬頭頻回

送王司業 元龜 守永嘉

中興天子初龍翔臨軒策士當維揚艱難果見異人出
龍虎甲乙俱非常先生大對過晁董指切時務言激昂
麟經絕筆二千載收拾紙上生光芒自從曲江到今日
勁氣獨得南方強權門用事手可炙申棖亦減平生剛
先生閉門玩文象簞弄日月潮之陽帝憂南國命共理
袁連二政俱循良公道方行正人用詔起韓愈師虞庠
先生不作進學解直言慷慨投封章一麾出守山水郡

十行詔墨加恩光東嘉得賢類京兆前政有張今有王

前守張
子韶

張公到官席未煖猶有遺愛如甘棠先生況是

儒宗師歛此大惠施一方入境願問民疾苦下車宜誅
吏奸贓首延瓊儒坐賢榻無使楊墨登門墻河內借恂
豈容久宸衷念賈殊未忘鰥生摠衣恨太晚執經未獲
時登堂私心竊喜父母國聖恩特許來龔黃願同何堅
首率化歸見潁川鳴鳳凰

春日遊西湖

丁丑

山色綠如染湖光青似磨峯高捧日久波闊浸天多瑞
氣浮城闕春光醉綺羅能將比西子妙句有東坡

梅溪前集卷八